

欽定剿平粵匪方略

欽定勦平粵匪方略卷五十二 癸丑年

八月初二日

甲戌

琦善奏言查浦口地方東通揚

州爲江防重地七月十八日金堂門外有賊船  
二十餘隻陸續駛至總兵武慶督率遊擊王巨  
孝整隊迎勦並知會副都統開隆阿等帶領大  
隊兵丁前往該逆開放槍礮抗拒該總兵分馬  
步爲二隊更番疊進施放槍礮火箭時值深夜

昏黑波濤洶湧逆船駛進北岸爲風所阻不能  
退回立時延燒盡成灰燼賊匪窘急被我兵殲  
斃多名焚溺死者無算生擒十六名奪獲大船  
十隻小船九隻所獲賊匪內有僞總帥二名副  
司馬一名至揚州賊匪困守堅城近日各路官  
兵疊獲勝仗城中之賊望援不至陰蓄鋌而走  
險之心七月二十一日外委姚長青帶勇赴徐

凝鈔關一帶出隊遇賊匪三百餘人出城賊見  
兵少直前圍裏守備葉萬春等帶兵援應賊匪  
退入街內參將師長鑣等各帶兵勇分四路進  
街掩擊斃匪多名餘賊遁走入城二十三日西  
門迤南埽垢山邊有賊鎚城而下參將鞠殿華  
等督兵施放連環槍礮斃賊六七十名又有賊  
匪由仙鶴嶺地方鎚下經都司葉舒青等帶領

弁兵攻擊提督陳金綬親率參將那瑪善等馳  
赴援應開放槍礮擊斃七八十名賊不能支仍  
登梯上城而去現飭官兵盡力圍攻並飭浦口  
等處照舊巡防肅清北岸以絕外援迅圖克復  
奏入

上諭內閣曰此次賊船猝至浦口經總兵武慶等督率  
弁兵於昏夜之中乘風縱擊痛加焚勦盡數殲擒實

屬奮勇出力著傳旨嘉獎其揚州逆匪亦經官兵截  
剿疊獲勝仗賊勢已極窮蹙著琦善等仍督飭各路  
兵勇迅卽克復揚城毋任賊匪乘閒竄逸

同日呂賢基李嘉端奏言逆匪自被湖北懲創  
後收集黨夥乘間撲至英山旋入太湖直抵石  
牌窺踞江家嘴並分股竄出洪家埠搶船意圖  
東下經已革臬司張熙宇督飭廣音泰富惠等

分兵兩路迎勦七月十九日廣音泰等督帶廣  
東兵馳至洪家埠先攻水路擊壞賊船十餘隻  
殺賊四五十名受傷落河者百餘名賊匪趕來  
救應我兵迎頭截擊殺賊數十名生擒二十餘  
名時富惠督率六安壯勇馳赴江家嘴該逆抵  
死抗拒適洪家埠勦敗之賊逃回該處我兵奮  
力攻擊殺賊數十名割獲長髮賊首級十餘顆

擊傷落水者百餘名生擒十餘名餘匪奔潰我  
兵奮勇窮追殺賊無算其運漕一股經李鴻章  
等帶勇直衝賊隊鏖斃執旗賊目一名現飭直  
隸州知州李登洲帶勇馳往會同剿辦查已革  
臬司張熙宇激勵弁兵將全股賊匪撲滅殆盡  
實屬奮勉可否量予鼓勵出自

天恩奏入

上諭內閣曰此次竄皖水陸賊匪大受懲創呂賢基等  
務當乘此聲威督飭帶領兵勇各員合力攻擊悉數  
殲除已革臬司張熙宇激勵兵勇將石牌全股賊匪  
撲滅殆盡實屬奮勉出力著加恩賞給五品頂戴

同日江西學政沈兆霖奏言 臣奉

旨飭查賊竄江西所過情形探詢五月十四日賊船未  
到南康府城卽有居民百餘人將署星子縣知

縣羅雲錦擁至城內偏東之同善堂看守隨即  
劫獄放出監犯十五日署知府恭安往城隍廟  
行香居民又擁至同善堂與署令一同拘管十  
六日賊船到南門外未及登岸居民即將守令  
獻出並餽賊銀米食物都司胡瑤林乘馬出城  
亦被居民執送賊船傳聞守令都司現在賊船  
拘禁並有署知府恭安已經拘斃之說至湖口

彭澤兩縣據署九江府知府顏貽曾稟覆均被  
賊放火箭燒燬衙署揚帆而去城池未失等情  
尙多疑竇仍須確查現在江省援兵四集防守  
兵勇亦甚得力賊用地雷轟城屢試屢窮省城  
可保無虞惟攻剿殊難得手緣賊退必乘船竄  
逸我兵並無舟楫何以兜剿尾追誠得下游用  
戰船由湖口而入內外夾攻不難聚而殲旃否

則卽能擊退又將他竄聞省中現亦籌辦湖口  
堵截等事然戰船旣無民船難覓祇能於陸路  
截擊恐難斷其揚帆下竄奏入

上命軍機大臣傳諭張芾曰沈兆霖奏探詢賊船尙未  
到南康府城卽有土匪劫官餽賊殊堪痛恨著張芾  
再行嚴密訪查如果實有其事卽將爲首匪犯按名  
訪拏盡法懲辦其府縣都司等是否現在賊船拘禁

署知府恭安有已經拘斃之說是否屬實湖口彭澤  
各城果否保守完固著一併查明據實具奏毋得稍  
有諱飾賊船下竄應如何豫備戰船及雇覓民船堵  
截竄擾之處著該撫與陳孚恩江忠源及地方官紳  
等迅速籌辦妥爲布置仍隨時知照湖北並下游各  
省一體設法堵截毋任賊船往來竄駛

沈兆霖又奏言江西省城雖可無虞而賊窮四

竄必擾外府省城之兵勢難處處兼顧外府團練人數不少若齊心一志自可無藉於兵力如撫州各鄉團合計不下數萬臣向守令紳士再三勸諭令糾合鄉兵爲守隘守城之計而各鄉皆以留保本村爲詞且謂所練之衆祇可防土匪殊不知賊攻城垣而但自保本村置城垣於不問庸有益乎臣思撫州如此各府各省亦必

皆然敢祈

特降諭旨通飭各省辦團紳士於練勇中精選十之二  
三聯爲鄉兵府縣有警各自救援其本府本縣  
不得株守本村以防土匪爲詞恃爲藏身之固  
外府外縣仍不得調往戰守以免擾累如此則  
外府皆可恃以無恐庶逆氛可靖矣奏入

上諭內閣曰前因逆匪各處紛竄勾結土匪擾害鄉閭

疊經降旨令各省倣行嘉慶年間堅壁清野之法或築寨浚濠或嚴守險隘原期守望相助互衛身家所有團練壯丁自不宜遠行徵調若本邑城池有警則附近村堡團練必應糾集壯勇合力援應使賊進無所踞退無所掠自不難一鼓殲除著各路統兵大臣督撫等剴切曉諭辦理團練各紳士凡附近郡縣鄉村一遇賊匪竄擾城池卽行會同官兵併力攻擊慎

勿株守一隅致有疏失蓋城池爲一方保障官民聯  
爲一氣斯卽衆志成城之效鄉團中如有援城殺賊  
立功者卽行奏請優獎以示鼓勵其隔府州縣仍不  
得遠行徵調以免擾累

初三日乙亥訥爾經額恩華托明阿勝保奏言懷

慶逆匪屢經痛剿堅匿不出七月二十二日臣  
托明阿勝保列隊齊進挖濠築牆移營逼近賊

壘該匪情急撲出槍礮如雨我兵奮勇迎擊斃  
賊數十名臣勝保乘勢揮兵前進越過濠溝拋  
入火彈拆毀土牆將瓦屋百餘間同時燒燬焚  
斃賊匪數十名生擒十一名各壘賊匪復擁出  
二三千名分股來撲我兵分投追剿副都統松  
玉等帶隊齊出臣托明阿善祿又撥令歸化城  
漢南鎮各弁兵繞列前隊槍礮環擊踰兩時許

賊旗紛紛倒地約斃四五百人斬獲首級二十餘顆臣誦爾經額恩華亦派撥馬步各隊馳赴丹河並令總兵郝光甲烏勒欣泰督兵直抵水北關槍斃手執黃旗賊匪四名燒燬木臺賊出馬步二隊繞撲我後我兵槍礮疊施斃賊多名又經左右伏兵齊出夾攻斃賊數十名賊始退避臣誦爾經額恩華擬於二十九日親統馬步

全隊於丹河口岸紮營督令兵勇過河直撲水  
北關正面分隊環攻使其抵禦不暇一面暗藏  
地雷以轟賊壘另於水北關旁面賊柵之外堆  
成土壘密令健卒層接而上拆其木柵以便接  
引兵勇齊入立破賊巢奏入

上命軍機大臣傳諭訥爾經額恩華托明阿勝保曰逆  
匪出巢抗拒我兵分路夾攻屢挫兇鋒亟宜乘勝進

勦請密經總恩華擬親統馬步全隊於丹河口岸紮  
營分隊環攻並暗用地雷另堆土壘拆賊木柵以期  
立破賊巢所辦均合機宜惟於丹河口岸紮營距賊  
巢遠近是否得力該大臣等仍應督率鎮將渡河攻  
勦與托明阿勝保等聲勢聯絡南北夾擊使賊匪腹  
背受敵方能得解城圍至賊巢旣破尤須嚴防竄逸  
西南一帶尙覺空虛應如何撥兵堵勦杜賊紛竄之

路隨時籌辦毋稍疏忽

同日奕經奏言查宿遷地方現設江南河南兩  
省糧臺乃清江後路前經陳明將派防之山西  
兵一千一百五十名統交江甯藩司陳啟邁就  
近帶領調遣並飭揀選壯健河兵扼要布置以  
壯聲威茲陳啟邁調補江蘇藩司卽赴新任所  
有宿遷帶兵事務懇

飭接辦糧臺之廣東高廉道法良統帶隨時相機調遣  
其揀選河兵亦令一手經理以專責成奏入  
上從之

同日舒興阿奏言懷慶被圍各路官兵雲集河  
北疊獲勝仗賊勢已極窮蹙一經官兵擊敗難  
保不渡河南竄北岸現無船隻恐官兵一時不  
能過渡追剿轉致節節落後又成尾追之勢現

調陝省之兵與其過河會剿莫若迎頭截擊以期防剿兼濟近日河南府縣有拏獲身騎葫蘆偷渡河南之賊是河北逆匪計圖南竄形跡顯著臣現飭陝兵自陝州先行馳赴河南府就近駐紮以資援應仍一面勤加偵探並飭駐紮孟津渡口之帶兵官珠克登等加意嚴防若懷慶賊匪南竄臣卽趕往孟津一帶迎頭截擊如河

北情形較爲緊急仍卽督兵過河進剿奏入

上命軍機大臣傳諭舒興阿曰據奏河北逆匪意圖過河南竄若官兵全數北渡則南岸空虛難於措手所慮不爲無見該督現駐河南府距孟津渡口不過三十里甚爲切近巡查自易周密該處先有珠克登所帶官兵一千餘名合之該督所帶已及三千數百員名如果賊匪窮蹙南竄儘足截剿惟過於旣竄之後

尤須防於未竄之先其緊要渡口旣駐重兵而偏僻  
港汊亦應嚴密偵察如果北岸實無一船而南岸渡  
河之具亦能收藏淨盡逆匪自無從偷渡尤應嚴拏  
奸細絕其竄路該督斟酌現在情形如河南布置已  
妥河北仍須接應卽行督兵渡河會剿勿誤事機

舒興阿又奏言陝州靈寶等處要隘亟應防守  
前於六月初三日遵

旨檄調總兵金萬全帶兵兼程馳往駐紮復經節次文  
催而該鎮任意逗留至七月二十日始抵陝州  
實屬遲緩且以武職乘輜行走顯違定例除將  
該鎮現帶官兵另派妥員管帶防守外相應請  
旨將總兵金萬全革職以示懲儆奏入得

旨金萬全著卽革職以示懲儆

上命軍機大臣傳諭陸應穀曰河南被兵處所民間蕩析離居殊堪軫念其稍有餘力者諒已集貲團練各抒惻忱若將應徵錢糧照常徵收民力更恐拮据著陸應穀慎委賢員詳細確查應如何酌量蠲緩之處迅卽馳奏候朕施恩

初四日丙子誥爾經額恩華托明阿勝保奏言七

月二十八日臣誥爾經額臣恩華親督侍衛托

雲保蘊秀前任河東河道總督文沖六品頂戴  
奕紀運司楊需並各鎮將文武員弁練勇兵丁  
直過丹河徑撲賊壘該逆分四股撲出抗拒我  
兵分作五路以四路迎擊賊隊以一路從中直  
衝木柵復督吉林黑龍江馬隊從旁分抄我兵  
奮勇爭先搶入木柵施放炸礮該逆猝不及防  
自相驚擾通永鎮兵丁孫化龍武陟縣練勇武

舉任殿揚首先登柵奪獲旗幟各兵勇立將木  
柵拆毀並用火器一齊拋擲烈燄飛騰木柵房  
屋焚燒幾盡該逆冒火衝煙奮力死鬪我兵槍  
箭刀矛並進斃賊千餘名其柵外迎拒賊匪見  
柵內火起歸路已斷紛紛敗走經兵勇追擊殲  
斃五六百名斬獲首級百數十顆臣托明阿臣  
勝保會同善祿等移營緊逼賊壘晝夜攻勦並

張貼告示解散脅從密用反間離其腹心悔罪  
投誠者不下數百人訊知二十二日接仗其僞  
丞相林淵詳李開芳已被礮傷賊營人心潰散  
猶於郡城東南隅挖地道妄思攻踞府城當  
卽密遣壯丁進城飭令嚴加防範適臣恩華舒  
興阿將火箭等項解到臣勝保亦於二十八日  
選派兵勇暗撲賊壘炸礮竹礮噴筒火箭一齊

施放兵勇隨進隨攻逆匪四路狂奔我兵往來  
截殺約數百人西凌阿明慶雙成烏凌額等帶  
領馬隊生擒四十餘名我兵縱火焚燒賊巢守  
城文武亦派兵勇縋城助戰總兵郝光甲烏勒  
欣泰各督兵接應四面圍攻統計斬獲賊匪二  
千餘名奪獲槍礮旗幟器械騾馬無算懷慶城  
圍立解餘匪皆蒼黃西竄旋於二十九日探報

逃匪中有頭戴黃巾乘坐竹轎賊目一人兵勇  
立節提挈有匪黨數十人上前奪護兵勇卽將  
該賊目擒出轎外割取首級並生擒搶護之賊  
十八名其投誠被脅二百餘人分別安置一面  
搜捕餘匪一面運送米糧接濟城內民食臣托  
明阿臣勝保善祿入城安撫臣訥爾經額臣恩  
華拜摺後亦卽親往宣布

德意妥爲撫恤至潰逃餘匪臣等復派副都統托雲保等分帶馬步官兵跟蹤追勦臣勝保亦擬拔營親督兵勇追躡其後務期悉數殲除並分咨山西河南各撫臣暨河臣長臻太常寺卿王履謙及駐紮孟津之副將珠克登等一體嚴密堵截不使一賊漏網查懷慶被圍將及兩月該地方文武嬰城固守不遺餘力無愧守土之官可否

同在事出力文武各員并由臣等奏請鼓勵之處出自

天恩奏入

上命軍機大臣傳諭訥爾經額恩華托明河勝保曰官軍攻破賊巢斃賊殆盡懷慶城圍立解並運糧接濟民食入城宣布德意不但闔郡紳民同聲欣感卽河北各郡人心亦可大定惟零匪西竄雖爲數無多而

奔突性成難保不散而復聚該大臣等派委將弁分帶馬步官兵跟蹤追剿勝保亦擬親督兵勇追躡其後並據稱已知照哈芬陸應穀長臻王履謙珠克登等一體堵截嚴密搜緝務期悉數殲除勿留餘孽斷不可因城圍已解屢勝之後稍涉大意其割取首級之乘轎賊目係何姓名其逆首林源詳李開芳受礮傷後是否業已殲斃卽向生擒各匪內細心研鞫如

爲夫職檢必應迅速躡緝勿令免脫該郡甫解倒懸  
於茲未復該大臣等督兵分駐彈壓卽飭令地方官  
俟撫衆施以副朕軫念窮黎至意

上諭內閣曰逆賊渡河北擾攻圍懷慶環城築壘大肆  
披猖經朕特命大學士直隸總督訥爾經額爲欽差  
大臣尙書恩華將軍托明阿內閣學士勝保幫辦軍  
務督率各路精兵會合進剿疊次獲勝該逆負嵎抗

拒將居六旬城中文武紳民極力守禦朕軫念生民  
方深焦灼本日據訥爾經額等馳奏官兵攻破賊巢  
城圍立解人心大定此皆仰賴

天恩默加眷佑朕心寅感倍增訥爾經額運籌決策調  
度有方著加恩賞戴雙眼花翎並賞穿黃馬褂恩華  
托明阿勝保幫辦軍務與善祿西凌阿力籌攻剿謀  
勇兼施洵堪嘉尚恩華著賞穿黃馬褂托明阿著賞

穿黃馬褂並賞給西林巴圖魯名號勝保著賞加都  
統銜並賞穿黃馬褂仍給予霍靈巴圖魯名號善祿  
著賞戴花翎並賞給斐里巴圖魯名號西凌阿著開  
復都統原官仍加恩賞戴花翎以示嘉獎懷慶府守  
城文武官員前經降旨加恩念其力保危城始終不  
懈允宜再沛恩施以爲守土者勸道員用懷慶府知  
府余炳燾著賞加按察使銜知府用河內縣知縣裘

寶鏞著賞加道銜候補遊擊穆奇賢著賞加副將銜  
仍與在事出力文武員弁及守城官紳兵勇與首先  
登柵奮勇尤著之兵勇均著該大臣等查明迅卽保  
奏候朕施恩軍機大臣祁嵩藻麟魁邵燦彭蘊章穆  
蔭夙夜在公贊襄樞務允當先沛恩施均著賞軍功  
加一級兵部捷報處郎中保成著賞軍功加一級委  
署主事恆興筆帖式國英均著賞戴藍翎仍各賞給

軍功紀錄一次員外郎舒弼文成主事壽齡筆帖式  
奎璋潘德成景新均著賞給軍功紀錄三次此次懷  
慶解圍逆匪殲除殆盡大河南北生民重登衽席軍  
威大振不難水陸並下直抵江南惟琦善向榮均係  
特簡大臣各統重兵攻圍金陵揚城均經數月之久  
株守無功若必俟北軍南下助剿始克奏功能無汗  
顏且朕於諸大臣倚爲干城切望同膺懋賞尙其同

心勦力迅圖克復三城綏靖南疆式符朕望

初五日丁丑雷以誠奏言臣營本無一兵僅恃募

勇三千名而東路萬分喫重節節扼要嚴防如

施家橋路通瓜州尤宜扼守以斷接濟經臣派

勇一千餘名委五品翎頂張翊國管帶防堵其

餘各要隘如李墅河等不下十餘處均經撥勇

巡防所有存營之勇不足千名不敷分布當此

賊情窮迫東竄時虞急應防勦衆施迅圖克復  
未便坐待援兵轉誤機宜臣已派員在清淮一  
帶陸續添募壯勇一千餘名合計臣營前後共  
募壯勇四千餘名連日勤加操練藉資攻勦奏  
入

上命軍機大臣傳諭琦善陳金綬雷以誠福濟曰逆匪  
占踞揚城業經半載琦善等經朕特簡統帶重兵數

月以來雖屢獲勝仗而未能克復朕心時深焦灼其  
竄擾懷慶之賊殲斃殆盡河北一帶漸就肅清逆首  
吉汶元早經殲斃林鳳詳李開芳等亦均受殲傷所  
餘零星賊匪不難盡數殄滅揚城賊匪勢本窮蹙一  
聞此信更應瞻落該大臣等務當乘此聲威督飭各  
路將弁兵勇合力圍攻一鼓作氣迅圖克復本日據  
雷以誠奏東路喫緊存營之勇不敷攻剿添募壯勇

一千餘名著卽照辦惟該處僅有壯勇四千餘名仍恐難資得力琦善與雷以誠福濟等雖分路駐紮其實共辦一事著卽相度情形如東路一帶緊要卽行派兵前往接應慧成容照等所帶之兵計日亦可趕到一併酌量擇要分撥萬勿任賊奔突復滋蔓延恐稍有疏失致賊竄逸朕惟該大臣等是問

同日

上命軍機大臣傳諭王履謙長臻曰官兵攻破賊巢懷  
慶餘匪窮蹙奔逃難保不復圖回竄著王履謙長臻  
督飭防河文武員弁嚴密巡查務將船隻設法收集  
毋令餘匪搶渡現在官兵四路追勦儻必須渡河所  
有應用船隻仍著妥爲豫備勿致臨時貽誤

上又命軍機大臣傳諭舒興阿哈芬曰河北勦賊大勝  
懷慶解圍餘匪西竄山陝與豫省交界地方必應嚴

密防範舒興阿現在駐紮河南府距孟津渡口甚近  
著卽督飭署副將珠克登實力巡防如有餘匪南竄  
卽行截剿其餘渡口著陸應穀督率該管地方官會  
同弁兵實力堵截所有渡口船隻固當無誤官兵往  
來仍須嚴防竄匪偷渡山西澤州與懷慶密邇防堵  
尤關緊要哈芬現駐太行山口著卽督飭帶兵員弁  
會合各路官兵實力兜剿其逃竄之匪尙恐有頭目

在內務當四面躡緝勿令一名漏網

初七日己卯王履謙長臻奏言查日來河岸一帶

逆匪紛竄尋覓渡船經兵勇四面截拏除槍擊  
格斃及落水淹溺外共獲逃匪四十餘名探報  
懷慶業已解圍餘匪覓渡正在濟源一帶對岸  
係孟津口迤上臣等前經奏明將原駐木欒店  
之河屯協兵二百名移紮該口以資捍禦嗣訥

爾經額咨商以孟津渡口現有陝甘防兵一千  
名足資扼守仍將河屯協兵撤回惟查孟津渡  
口兩岸皆須設備河南府知府李潔現帶兵勇  
一千數百名專駐南岸嚴拏逃匪復經撫臣派  
撥弁兵二百五十名協同陝甘弁兵上下巡哨  
已昭嚴密而河屯協兵撤回以後北岸仍屬空  
虛相應請

旨飭下陝甘督臣分兵五百名移紮孟津北岸以期兼顧而免疏虞

王履謙又奏言查懷郡賊匪敗竄往來無定回竄偷渡在在須防北岸既有河臣長臻駐守河北道蔣啟敷亦已到工協防臣拜摺後先帶河標兵五十名前往南岸各口周歷巡緝並飭沿河文武實力嚴防惟河岸綿長臣一人耳目難

周仍帶同知府戴鸞翔等上下巡查搜拏私渡  
以肅河防奏入

上命軍機大臣傳諭王履謙長臻曰現在懷慶解圍餘  
匪已竄孟津渡口兩岸皆須嚴防偷渡其南岸兵勇  
已有二千餘名北岸須添兵協防惟舒興阿所帶官  
兵無多不便分撥諭令訥爾經額於所轄官兵內速  
撥五百名派員帶往孟津北岸巡緝著卽妥爲布置

王履謙現帶同知府戴鸞翔等於黃河上下各口周  
歷巡查無論南岸北岸均須兼顧著長臻嚴飭河標  
弁兵協同地方文武認真巡防毋令竄匪乘間偷渡  
上又命軍機大臣傳諭訥爾經額曰前獲懷慶解圍捷  
報朕心稍慰惟西竄餘匪究係逃往何處是否竄入  
太行抑由黃河渡口四竄連日追擊情形如何著訥  
爾經額飛速馳奏以紓廑念仍隨時知照舒興阿張

祥河陸應穀哈芬於各要隘一體嚴密堵截務期悉  
數埽除斷不可令餘燼復燃致滋延蔓本日據王履  
謙等奏孟津北岸空虛請飭舒興阿分兵五百名移  
紮該處以期兼顧現在舒興阿駐紮南岸防勦亦關  
緊要著飭爾經額於河北官兵內速撥五百名派員  
帶往孟津北岸駐紮巡查毋稍遲誤

初八日

庚辰

勝保奏言

臣

自懷郡解圍後一面搜

拏零匪安撫居民一面分兵派員跟蹤追勦提  
臣善祿已先帶兵前進臣於八月初二日督率  
將士徒步裹糧而行鑼鍋帳房不及隨往是日  
行抵濟源縣探知逆匪竄至焚擄村鎮圍攻縣  
城聞大兵已到復從西竄士卒沿途追勦斬擒  
賊匪一百數十名查濟源西路毗連山西垣曲  
山路崎嶇逆匪被創狂奔是其長技我兵裹糧

徒步率多疲乏勢恐尾追不及現已與善祿西  
凌阿函商兩路進剿一由封門山邵原關前進  
一由濟源順黃河一帶直赴垣曲以便會剿臣  
慮懷慶西路空虛屢次札調總兵郝光甲速渡  
沁河杜賊西竄無如該鎮以駐守七里橋爲詞  
半月之久未肯移營渡沁以致餘匪西竄事機  
不宜再誤應請

飭下統兵各大員並山西撫臣速派得力弁兵於垣曲西北各隘口實力截剿臣等仍趕緊追擊以期及早殲除不留餘孽

同日山西布政使郭夢齡奏言八月初四日接准撫臣哈芬由澤州行營飭知懷慶解圍餘匪向西竄逸臣深慮該匪由濟源竄入晉省當飭蒲州府知府瑞昌就近探明賊蹤轉稟陝甘督

臣舒興阿酌派官兵迅赴垣曲一帶防剿正擬稟請撫臣移營迎剿間旋於初五日接據防堵同知魯鴻疇稟稱初一日賊匪已到濟源縣屬封門口地方所有前派防堵垣曲之大同鎮兵七百餘名經河東道飭令分赴各隘口駐紮一面札飭垣曲縣知縣晏宗望等帶領練勇登陴固守該同知前往硤口等村募勇協禦初二日

聞賊圍垣曲縣城該同知趕緊折回見北門已  
開知爲賊踞傳聞河東道張錫蕃垣曲縣知縣  
晏宗望尙無下落等情查垣曲離省九百里南  
界豫省西界河東東界澤州北界平陽現在賊  
竄垣曲惟有先守平陽一帶以杜北竄兼固省  
城而保畿輔門戶查撫臣已至陽城署臬司郭  
用賓尙在太行山駐紮所有太大二鎮官兵先

後調赴直隸江南九千餘名本省潞澤蒲解絳  
等府州五千餘名省城僅存兵一千三百餘名  
練勇二千餘名不敷防守刻又商同前太僕寺  
少卿徐繼畲等督令紳民趕緊續練壯勇以資  
守禦除飛稟撫臣暨河北統兵大臣誦爾經額  
等酌派重兵由澤州入山取道平陽迎頭截擊  
並請陝甘督臣舒興阿派兵由平陸縣茅津渡

就近前來接應兼飭省南各府州縣一體嚴防  
外伏乞

飭下懷慶陝州統兵大員速撥重兵來晉分投堵剿均  
奏入

上命軍機大臣傳諭勝保曰該逆圍攻濟源縣城聞大  
兵已到卽時西竄勝保與善祿西渡阿分路進剿該  
逆已竄入垣曲勝保統兵追剿事權必須歸一所有

各路大營追剿官兵俱著准其調遣以專責成山西  
本省將弁兵丁亦准酌量調撥如有不遵節制遲延  
貽誤者卽行嚴叅治罪山西兵力太單哈芬又未悉  
賊情恐其布置不能周密勝保善祿西凌阿等旣分  
兩路追剿務須設法繞出賊前或飛咨哈芬令將何  
路官兵調至何處庶可前後夾擊迅掃賊氛

上又命軍機大臣傳諭托明阿勝保善祿曰賊匪竄入

垣曲縣城該縣北界平陽西鄰河東該省官兵調赴  
他省已九千餘名巡撫哈芬甫自澤州前赴陽城尙  
未知垣曲失事是該處兵力旣單聲勢亦不聯絡賊  
匪自懷慶敗竄後奔突而西及早勦除尙易淨盡否  
則成滋蔓難圖之勢本日已諭令訥爾經額等迅飭  
鎮將大員帶兵由澤州一路抄出賊前迎頭截擊著  
托明阿卽統兵馳往與勝保善祿合力夾攻乘賊匪

喘息未定一鼓殲除萬勿稍有遲誤

上又命軍機大臣傳諭哈芬郭夢齡曰前因懷慶賊勢窮蹙西路濟源等處空虛屢諭統兵大臣及山陝督撫嚴堵要隘昨因郡城解圍訥爾經額等摺內有餘匪西竄之語復經申諭哈芬等會合兜剿茲據郭夢齡奏稱賊匪自封門口擾及垣曲地方何以該處竟無準備該撫僅知防守陽城各隘而於垣曲防守未

經議及是又墮逆賊避實擊虛之詭計現在本省兵力不能分撥出剿該撫已抵陽城急應前往扼要地方繞出賊前截擊萬不可稍涉遲延再有貽誤此時敗殘零匪數尙不少若任令搶掠裹脅恐又成滋蔓難圖之勢現在勝保善祿等帶兵西追本日復諭令訥爾經額派兵迅由澤州一路截擊並令托明阿帶兵前往與勝保等合力夾攻著該撫嚴諭各屬地方

文武聯絡紳民悉力防禦但能固守城池援兵一到立可殲除此卽堅壁禦寇之善策澤州府在籍御史王遙昭聞其倡辦團練頗有成效卽傳旨諭令督率練勇商同本籍紳士妥爲防衛潞安一帶防守亦關緊要儻賊匪由澤潞一帶分路竄入蔓延更不可問署臬司郭用賓現駐太行卽責成嚴防不可稍有疏失哈芬遠在省南所有省城一切籌防著該藩司卽

督飭文武員弁並與前任太僕寺少卿徐繼畬前任  
鴻臚寺卿賈克慎前任內閣侍讀學士郭景億等商  
同辦理河東道張錫蕃垣曲縣知縣晏宗望是否先  
期逃避著該撫與該藩司一體嚴查儻有棄城先遁  
情形卽著革職拏問按軍法從事防守隘口各官兵  
是否遇賊卽潰亦著查明具奏蒲解等處逼近陝省  
尤應亟籌堵禦著卽知照舒興阿張祥河飭令派防

文武一體嚴查至勝保進剿赴晉之兵應需糧餉著該撫與該藩司卽飭承辦糧臺之員隨時接濟

上又命軍機大臣傳諭請爾經額恩華曰賊匪竄入晉境擾及垣曲亟宜迅速剿辦哈芬行抵陽城已諭令星馳督剿惟山西兵力太單著該大臣等迅派精兵出澤州入山探明賊蹤迎頭截擊並著官兵由正定府獲鹿井陘一路入山以爲太原後路接應前經調

防直隸之山西官兵卽可令其折回晉省以資攻勦  
該匪窮蹙奔竄喘息未定必當乘此迅速追截以期  
悉數殲除山西與直隸處處毗連關係甚重想該大  
臣等定能統籌全局迅速布置也總兵郝光甲前經  
托明阿勝保調赴西路堵截若卽遵調早渡沁河前  
往何至該匪從此路竄逸著訥爾經額嚴飭該總兵  
等星速追勦如再有延誤定卽重治其罪勝保等裏

糧道行鑼鍋帳房未及帶齊著卽催令糧臺迅速運  
送前進其火藥鉛丸均著隨時接濟

上又命軍機大臣傳諭桂良曰懷慶餘匪竄入山西垣  
曲縣已諭知訥爾經額迅速派兵由澤州一路截勦  
並分兵由獲鹿井陘一路入山以爲太原後路接應  
直隸爲畿輔重地所有毗連山西各要隘該尙書仍  
當隨時妥爲布置慎密設防並緝拏土匪盤查奸細

勿任勾結爲患

上又命軍機大臣傳諭舒興阿曰賊匪西竄垣曲勝保  
自懷慶拔營與善祿等跟蹤追剿卽可馳抵晉境舒  
興阿現駐河南府城著卽就近派委鎮將大員統帶  
官兵由平陸之茅津渡星馳前往應援與勝保等合  
力夾攻總須抄出賊前不令竄入平陽蒲絳一帶此  
股賊匪敗竄之餘迅速兜圍可期掃除淨盡總兵郝

光甲與烏勒欣泰先由訥爾經額派往追捕該總兵等由何路進兵卽著該督飭令飛速前進其黃河渡口有珠克登帶兵巡防仍當嚴密偵察潼關一帶與山西河南毗連均須加意防守不可稍有疏虞

同日

上諭內閣曰自賊匪竄擾大河南北豫省官紳兵民人等勦力同仇登陴守禦朕心實深嘉慰昨懷慶解圍

守土各官均經優予獎賞並特旨令統兵大臣等將該處出力之官弁紳民兵勇查明保奏矣因恩懷郡被困將近兩月竟能力捍危城保障河北固由守土官吏激勵有方亦由該郡士民深明大義允宜破格施恩用昭獎勵所有懷慶府縣學額著該部酌量增加以爲紳民固守者勸至開封之擊退賊匪許州之保全城邑民心堅定均屬可嘉著一併賞加學額該

部卽查明該府州縣學額酌擬加額名數具奏以示  
優獎

初九日 辛巳

上諭內閣曰昨有旨令該部酌增河南懷慶及開封許  
州各學額以示優獎因思上年廣西桂林湖南長沙  
各省城先後被圍日久均能竭力捍禦轉危爲安該  
處士民志切同仇深明大義自應一體破格施恩以

昭激勸所有廣西桂林湖南長沙府縣學額著該部  
一併查明酌擬加額名數具奏

同日

上諭內閣曰朕惟致治之方安民必先察吏各省府廳  
州縣皆係親民之官如能戢暴安良留心教養俾小  
民咸趨正業何至惑於邪說相習爲非自軍興以來  
被賊滋擾地方固因奸民煽亂亦由吏治廢弛釀成

巨患卽有一二循良之吏力求整頓地方者或因資  
格較深循例遷擢又或因該管上司調署他缺未能  
久於其任致令司牧之官視職守如傳舍置地方利  
弊於不問民風何由而淳吏治何由而飭現在被兵  
省分瘡痍未復亟須廉明之吏拯我羣生著各該督  
撫察看該省緊要缺分及凋敝之區慎簡賢員俾令  
彈壓撫綏力圖補救如果撫馭有方著有實效卽行

奏請給與升銜仍留本任數年之後政成報最朕必  
破格施恩超遷不次其餘各直省地方並著各該督  
撫等隨時體察如有人地相宜不須更調者亦可奏  
請加銜留任俾盡心民事興利除弊日起有功朕將  
求才於循吏之中備他日封疆重寄其各勉圖報稱  
以副朝廷任官惟賢之意

臣等謹案逆匪初起粵西不過數人倡亂厥

後蔓延日甚裹脅居多夫民豈樂從逆哉飢  
寒迫之邪說惑之也使牧民者若龔遂之治  
渤海黃霸之治潁川則化盜爲甯豈煩

天討吏治與兵事相終始故選吏急於選將漢代循良  
大率累稔不遷就加恩秩蓋賞優則人勸任  
久則化行都哉

聖謨異世而同揆矣